



Inatsisartuni ilaasortaq  
Malik Berthelsen, Siumut

## **Pineqartoq: § 36, imm. 1 naapertorlugu apeqqut nr. 2010-228-mut akissut**

Asasara Malik Berthelsen,

Sisimiuni qulimiguulinnut mittarfitoqqap atorreqarsinnaaneranut tunngatillugu apeqquti-vit ilassutaanut qujanaq. Qeqqata Kommunia qulimiguulinnut mittarfiup siunertaata namminersorluni mittarfinngortillugu nassuiaammik allanngortitsinera Namminersorlutik Oqartussat qulimiguulinnut mittarfiup atorreqarneranut isumaannik allanngortitsisimanersoq, taamaalillunilu Heli Greenlandip naammassisassaanik allanik inatsiseqarnerasoq apeqqutigaat.

Kingulliullugu taaneqartut siulliullugu akissuteqarfiginiarlugu pingaaruteqarpoq erseqqis-sassallugu, timmisartoqarfimmik pilersitsinermut atatillugu teknikkimut tunngasunut akuersissummik pissarsisoqartussaammik, aammalu najukkami pilersaarummik akuersissuteqartoqartussaalluni. Teknikkimut tunngasunut akuersissut Angallannermut Aqutsisoqarfimmit (1. november 2010 aallarnerfigalugu aamma Statens Luftfartsvæsen-ip (SLV) inissisimaffigiligassaa) suliarineqartussaavoq, tassanilu teknikkimut piumasaqaatit arlallit naammassineqarsimasussaasut tunngavigineqassapput. Inatsisit eqqarsaatigalugit piumasaqaatit taakku BL-ini – silaannakkut angallassinermut aalajangersakkani - malittarisassiuunneqarput. Piumasaqaatit taakku naammassineqarsimanersut Angallannermut Aqutsisoqarfiup aalajangertussaavaa. Taamaattumik Heli Greenlandip, ingerlatseqatigiiffimmut Sisimiut Flight Adventure Center-imut (SFAC) ilaasup, qulimiguulinnut mittarfimmik ingerlatsinissamik kissaateqartup teknikkimut tunngasunut piumasaqaatit taakku naammassisimanerai akisinnaanngilara.

Angallannermut politikikkut naliliinermi pilersaarusionerq nunaminertallu atorreqarneri pillugit Inatsisartut peqqussutaanni § 10 tunngavigineqarpoq, tassanilu allassimavoq, kommunimi pilersaarummik allanngortitsinermi immikkut ittumik mianerisassat, Namminersorlutik Oqartussani oqartussaasunit isumagineqartut unioqqutinneqassanngitsut. Tassalu paragraffimi angallannermut politikikkut isiginiagassat pingaarnerit ilaatinneqarnissaat periarfissiisutiginerput. Qeqqata Kommunianut tusarniaanermi siullermi ersarissumik allassimasutut, silaannakkut angallannermi attaveqaatini nammaqatigiinnissaq tunngavigineqarpoq, taassumalu atuunneratigut atortut pioreersut sapinngisamik annertunerpaamik atorreqarnissaat pingaartinneqarpoq. Namminersorlutik Oqartussat Kalaallit Nunaat tamakkerlugu mittarfinnut aningaasarpasuumik aningaasaliisarput – assersuutigalugu Sisimiuni mittarfik 200 mio. koruunit pallillugit akeqarsimavoq. Mittarfiit aserfallatsaaliniarlugit, aammalu taakkununga piumasaqaataasut naammassineqarnissaat isumaginiarlugu annertuumik sulisoqarpoq. Taamaalilluni aamma soorunami innuttaasut naapertuunnerpaamik A-miit B-mut timmisartuunneqarnissamat taamaalillunilu angallanneqarnissamat periarfissaqarnissaasa isumagineqarnissaa siunertarineqarpoq.

4. november 2010  
Sagsnr. 2010-040348  
Dok. Nr. 497454

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanaq.gl  
www.nanaq.gl

Tamanit naluneqanngitsutut Kalaallit Nunaat nunarujussuuvog isorartooq, ikittunik ki-siannili siammasissorujussuarmik najugaqartunik inoqarluni. Tamatuma kingunerisaanik nunatsinni timmisartoqarfiit pisinnaasaat tamakkerlugu atorneqanngillat. Tamanna pis-sutigalugu isumaqarpunga, timmisartoqarfiit pioreersut akimorlugit timmisartoqarfimmik nutaamik pilersitsinissaq iluaqutaassanngitsog, taassuma namminersortunit imaluunniit pisortanit ingerlanneqarnera apeqqutaatinnagu.

Tassani oqaatigissallugu pingaaruteqarpoq, Mittarfeqarfiit aningaasaqarnerat aammalu Nunap Karsianit tapiissutisarisinnaasaat imminnut ataqatigiittorujussuummata. Timmi-sartoqarfimmik unammillertumik pilersitsisoqarnerata kingorna Mittarfeqarfiit aningaasa-qarnerat eqqornerlunneqarsinnaavoq. Pissusiviusut tunngavigalugit timmisartoqarfimmik ataatsimik pilersitsinissamut akuersissuteqartoqarpat, assigiissitsinissaq aallaavigaviga-lugu illoqarfinni timmisartoqarfeqareersuni timmisartoqarfinnik allanik pilersitsinissamut akuersissuteqartoqartariaqalertussaavoq. Tamatuma inernerisaanik siunissaq eqqar-saatigalugu Mittarfeqarfiit Nunap Karsianit aningaasaliiffigineqarnissaa pisariaqalissaaq.

Tamanna eqqarsaatigalugu Sisimiuni mittarfik pioreersog atorlugu aaqqiissutissamik suliaqarniarpunga. Paasivara SFAC timmisartunut oqquisitsisarfimmik atorfissaqartitsi-sog, siornatigullu oqaatigeriikkattut qulimiguulinnut mittarfitoqqap eqqaani nunaminer-tami qulimiguulinnut oqquisitsisarfeqarfimmik pilersitsilluni aaqqiissuteqarsinnaaneq i-sumalluarfigaara. Qulimiguulinnik oqquisitsisarfinni, timmisartoqarfinnut toqqaannartu-mik atasunngorlugit suliaanngitsuni inissimatitsisarluni periaaseq nunap iluani sumiif-finni allani atorneqartoq takuneqartareerpoq. Tassalu qulimiguulik ullaakkut timmisar-tuussinerit pilersaarutaasut naammassiniarlugit mittarfimmut timmisassaaq, ullullu inger-lanerani pilersaarutaasut naammassineranni oqquisitsisarfimmut utertassalluni.

Erseqqissassallugu uannut pingaaruteqarpoq, uanga – Naalakkersuisullu sinnerisa – soorunami inuussutissarsiutinik ineriartortitsinissamut suliniutit nutaat tapersensoratsigit, aammalu tamatumunnga sukkulluunniit akornusiinissarput kissaatiginnginnatsigu. Ta-matumali peqatigisaanik attaveqaatit tamarmiusut ataqatigiinnissaannut qulakkeerisus-saavugut. Isumaga malillugu aaqqiissutissatut matuma siuliani saqqummiussara atorlu-gu nalornissuteqarnermik tamatuminnga aaqqiigallartoqarsinnaavoq.

Naggasiutigalugu oqaatigissavara, allaffeqarfinniit 2010-mi novembarip qiteqqunnerani ataatsimoorluni ataatsimeeqatigiinnissaq, taamaalillunilu suleqataasut tamarmik peqa-taanissaat suliniutigineqarmat. Ataatsimiinnermi tassani suliami apeqqutit tamarmik a-kissutissarsineqarumaartut qularinngilara.

Inussiarnersumik inuulluaqqusillunga

Jens B. Frederiksen